



清刻龍藏佛說法變相圖

佛說羅摩伽經卷第一

體七

乞伏秦沙門釋聖堅譯

如是我聞一時佛在舍衛國祇樹給孤獨園
 莊嚴重閣善勝講堂與菩薩摩訶薩普賢菩
 薩文殊師利菩薩等其名曰光明幢菩薩須
 彌山幢菩薩寶幢菩薩無礙幢菩薩華幢菩
 薩淨幢菩薩日光幢菩薩靜正幢菩薩離塵
 幢菩薩世靜幢菩薩地威德幢菩薩寶威德
 菩薩大威德菩薩金剛智威德菩薩淨威德
 菩薩法日威德菩薩功德山威德菩薩智焰
 威德菩薩普現勝威德菩薩持地藏菩薩虛
 空藏菩薩蓮華藏菩薩寶藏菩薩日藏菩薩
 功德淨藏菩薩法印藏菩薩世淨藏菩薩不
 憍慢菩薩蓮華勝藏菩薩善淨眼菩薩清淨
 眼菩薩淨眼藏菩薩無著眼菩薩普集眼菩

薩善觀眼菩薩優鉢羅華眼菩薩金剛眼菩
薩寶眼菩薩虛空眼菩薩善眼菩薩普眼菩
薩天冠菩薩法界焰智天冠菩薩道場天冠
菩薩栴檀光天冠菩薩佛藏天冠菩薩山勇
天冠菩薩世淨天冠菩薩威儀天冠菩薩無
能勝菩薩諸佛師子座覆觀菩薩普法界虛
空光觀菩薩梵勝髻菩薩龍勝髻菩薩佛變
化焰髻菩薩一切願海摩尼髻菩薩如來圓
珠髻菩薩虛空掌珠寶髻菩薩如來遊戲珠
王網髻菩薩如來法輪香髻菩薩一切三世
香髻菩薩大光菩薩離垢光菩薩寶光菩薩
離塵光菩薩焰光菩薩法光菩薩寂光菩薩
日光菩薩遊戲光菩薩天光菩薩功德相光
菩薩智相焰菩薩法相焰菩薩神通焰相菩
薩光焰相菩薩華相焰菩薩珠相焰菩薩菩

提焰相菩薩梵相焰菩薩普光焰相菩薩梵
音菩薩海音菩薩辯才音菩薩世王音菩薩
山相擊音菩薩一切法界普音菩薩一切法
海雷音菩薩調伏魔界音菩薩大悲雲雷音
菩薩一切世間寂音菩薩法界慧菩薩智勇
菩薩功德須彌勇菩薩功德牙勇菩薩稱勇
菩薩普焰勇菩薩大慈勇菩薩智海勇菩薩
如來種姓勇菩薩光勝菩薩妙勝菩薩勇勝
菩薩世淨勝菩薩法勝菩薩月勝菩薩虛空
勝菩薩寶勝菩薩星勝菩薩智勝菩薩樹王
印勝菩薩法王印菩薩世王印菩薩梵王印
菩薩山王印菩薩珠王印菩薩龍王印菩薩
寂王印菩薩不動王印菩薩仙人賢力王印
菩薩勝王印菩薩寂香菩薩無極香菩薩地
香音菩薩海雷香音菩薩法豔香音菩薩虛

空香音菩薩衆生功德香音菩薩衆生善根
香音菩薩魔界香音菩薩智山光菩薩虛空
意菩薩淨意菩薩無著意菩薩覺悟意菩薩
三世焰意菩薩光意菩薩普明意菩薩法界
焰意菩薩如是等菩薩摩訶薩五百人俱行

同普賢悉皆具足無著境界普現十方無量
佛土身量無極徧諸佛前又修無礙淨眼境
所心無休息普集一切諸佛功德決定了
於菩提道普集無量光明深入一切法智海
常行無著無所受心得大慧身滿足無量無
數劫四辯無窮七盡智慧如虛空無依無所著
隨衆生所樂如意現色身淨眼無垢障如日
處空中於一切法界光明悉充滿復有五百
聲聞久已通達四諦明了本際深入法性離
生死海隨順如來聖弟子衆於諸有結心得

解脫於佛法海無有疑惑復與無數諸天王
俱又於先佛植衆德本普爲衆生作不請之
友久受心戒具諸功德普勝天人而無高心
不捨煩惱皆已盡心智解脫如虛空於佛法
中無有疑深入諸佛智慧海隨順如來諸聖
威儀承佛教誡成就衆生護佛法種使不斷
絕緣此善根常生佛家深樂種智眞實法門
爾時諸菩薩聲聞大衆諸天魔梵及諸神仙
各與眷屬恭敬圍繞咸作是念念如來行念
佛境界念佛自在神通變化念如來持念如
來力念如來無畏念如來住念如來三昧念
於如來勝妙功德念如來身念如來智無有
涯底一切天人不能測量無能分別無能開
現無能知見無能宣明亦無有能如實解說
除佛持力佛自在力佛智慧力佛辯才力佛

威神力佛三昧力佛神通力佛本願力過去
善根力親近善知識力清淨信心力住方便
力樂求清淨勝妙善根力正直菩提深心力
一切智願力是故世尊知識衆生種種欲種
種信種種解而心無二以無著聲覺悟一切
知道者說道者善說諸地種種行種種根種
種人種種信種種解種種思及知一切智人
境界各各思惟如來功德咸願宣說如來昔
爲菩薩時行願善業先所修習一切智願勝
波羅蜜示現菩薩諸地神通莊嚴方便衆妙
音響莊嚴菩薩行出生滿足海莊嚴菩薩善
提門示現菩薩自在道出生菩薩莊嚴海莊
嚴如來遊戲神通莊嚴如來自在法輪莊嚴
如來如來利海莊嚴如來普現十方調伏衆
生而不現身心住諸如來正法之城超勝功

德普廣示現一切諸道如來法王爲一切衆
生示現諸趣明淨普照神通自在力如來爲
一切衆生最上福田如來爲一切衆生說功
德嗟觀三輪化度一切衆生惟願如來悲愍
一切具足顯現爾時世尊知諸菩薩心之所
念以大悲身大悲門大悲心大悲本願力隨
順大悲廣大如法性究竟如虛空入師子王
奮迅三昧爲令一切衆生樂清淨法入三昧
已時祇陀林重閣講堂忽然光麗廣博嚴淨
梵天金剛莊嚴其地珍奇間錯衆寶嚴飾雨
如意珠及諸名華時彼林中表裏映徹有瑠
璃樹枝條華果皆衆寶成雜色光明迴旋其
間樂見珠玉以爲羅網閻浮檀金及衆校飾
間無空缺彌覆其上又以名珍莊嚴樓閣普
光摩尼爲明珠柱修直光色照徹園林金戶

珠簾寶璣欄楯四出隘道衆寶所成摩尼寶
王化珍妙華於其髻端放真珠光列植階簷
羅蔭軒陛幢幡繒蓋滿虛空界於窻牖前寶
樹化生猶娑羅林自然行列果如寶鈴發衆
妙音於樹根下出瑠璃水香淨柔軟流遍祇
洹佛神力故本願力故十方世界微塵數不
可思議阿僧祇清淨佛刹無量無數諸供養
具皆悉普現於祇陀林復有功德香河迴浴
淨國無量寶華隨流化生不可窮盡華水有
聲皆說菩薩報應之行華樹敷榮出香雲蓋
諸香蓋中有不可思議諸樓閣雲有阿僧祇
不思議華鬘瓔珞皆悉垂下阿僧祇寶摩尼
珠玉自然涌出柔軟衣服及諸寶幢香烟幡
蓋皆悉充滿復有無數諸寶華雲旋轉空中
一切幢幡及諸華蓋衆寶鈴幢出妙音聲演

說一切諸佛名號顯現清淨法輪之相復有
師子如意珠王以音聲海普演諸佛本願海
門一切法界寶王摩尼法相光明以爲莊嚴
時祇陀林上虛空之中有不可思議阿僧祇
等諸香樹雲如是種種諸供養具及諸佛刹
諸莊嚴事無量無邊不可具說爾時善財童
子從東方界求善知識漸漸遊行至南方界
轉至西方遙見善勝長者在屈頭摩城發意
欲向漸涉道路思惟正受繫念在前無分散
意住正定聚雖在道路愛樂正法無悔恨心
不退境界勇猛精進不畏險路念善知識修
正覺道爲得安隱道故身心無盡在於中道
作如是念我當云何得勝境界我今云何當
速詣善知識問菩薩道修菩薩行於善知識
作佛道因緣得諸波羅蜜普攝一切離諸障

礙入無著法界普爲一切衆生斷衆惡道業
爲除我人衆生壽命之心滅除一切煩惱諸
塵破滅一切諸見羅網成就善箭以慈悲弓
射護法處成就因果何以故若得見值善知
識者必得成就諸善功德善知識者能爲一
切智作大根本身心正受顏色不變求善知
識威儀庠序無卒暴相漸漸往至屈頭摩城
見善勝長者在於彼城重閣講堂即前詣已
如人遊海水中不見邊際百千萬億諸大長
者以爲圍繞皆悉歡喜在於善勝長者左右
各欲樂聞種種諸法如海導師爲諸商人說
海寶處善勝長者善能分別佛法海寶爲一
切衆說無所著無所分別爾時善財童子頭
面敬禮白言大聖我已久發阿耨多羅三藐
三菩提心但不知云何行菩薩道修菩薩行

善勝長者告善財言善哉善哉善男子汝已
能發菩提之心善能問於大智慧寶爲得如
是甚深法義爲斷一切疑惑苦惱種子汝今
問我爲到一切智岸以不破壞心正向大乘
令離一切聲聞辟支佛地怖畏正趣佛道修
諸三昧寂靜法門善修一切諸菩薩行願遊
戲神通轉不退輪淨諸業道速疾迴向一切
智心於菩薩行如實修行爲菩薩道故來問
我行此行者普見十方無有障礙善知一切
智海對治門莊嚴一切菩薩行故來問我善
男子我在此海岸屈頭摩城重閣講堂晝夜
常說大慈大悲菩薩淨行法門善男子我於
此閻浮提見諸貧苦衆生必欲饒益然後爲
說甚深空義隨彼所願令得滿足或以飲食
而攝取之或以法財而攝取之或以功德業

而攝取之或以智慧而攝取之或以善根正
直業而攝取之應以菩薩根而攝取者即以
菩薩根而攝取之應以發菩薩心而攝取者
即以菩薩心而攝取之若應以除去疑惑發
菩提心者即以除疑惑法而攝取之若應以
喜悅發菩薩心者即以喜悅法而攝取之若
應以大悲發菩薩心者即以大悲而攝取之
若有應以除生老病死憂悲苦惱無常定法
發菩薩心者即以苦空無常法而攝取之若
有衆生應以住生死海心無疲倦即同住生
死海而攝取之若有應以四攝法發菩薩心
者即以四攝法而攝取之若應以一切智慧
功德海發菩薩心者即以功德智慧海隨順
法而攝取之若有應以一切三世諸佛正法
海對治門發菩薩心者即以三世諸佛正法

海而攝取之善男子我以如是等諸攝取法
爲饒益衆生故令一切衆生得法利樂故在
海此岸善男子我住於此岸普知一切海中
珍寶及所出處根原種性及價貴賤清明之
相識寶光明善能分別善知一切工巧技術
善知一切諸龍龍七龍王龍子宮殿差別亦能善
除諸龍鬪諍怖畏惡相又復善知一切諸羅
刹王宮殿村落亦能善除羅刹鬪訟及與怖
畏又復善知一切魑魅魍魎諸惡鬼神所住
之處亦能除滅一切海水迴波諸難并知水
色泉源衆流善能瞻知日月星辰一切災異
變怪之事晝夜瞻相無一念頃失於常度了
了分明無分毫差善知一切書疏算數射御
隨時能用善知一切衆相於刹那頃變怪不
停或合或離善知籌量世間衆事善男子汝

今當知我以知此一切衆生十明法門安止
清淨住無畏岸令彼彼衆生皆得安隱恒以
正法而撫慰之若閻浮提有諸賈估賈客欲
往大海求珍寶者稱我名故大獲珍寶安隱
吉還若有衆生得聞我名者身心諸垢及以
衣垢永得消除何況煩惱若有衆生眼視我
者常得清淨無上法喜聞法無厭身心悅樂
以此法樂普爲一切閻浮提內諸苦衆生兩
大法兩令得悅樂若有衆生聞我說法必得
安隱度生死海免諸怖畏必得安立一切智
海永離渴愛無復憂患恒住三世明解脫海
善男子汝今當知我能常入一切衆生心心
數行海中令彼衆生修淨土業普知一切十
方淨國海隨意往生得無礙業復能莊嚴一
切淨業根海普能清淨一切諸衆生行海令

住安樂寂靜大安眠海善男子我以知此大
慈悲喜捨對治滅相擊音聲菩薩喜幢法門
諸大菩薩成就無量諸功德智慧海善能分
別一切世界行海斷除一切煩惱業海成就
一切諸法界海普攝一切諸衆生海及世界
海普入一切勝智慧海終不捨一切衆生海
其心如地善能隨順一切衆生海普能教化
一切衆生海善隨一切衆生威儀海諸大菩
薩深行如是我當云何能知能說彼功德行
爾時善財童子頭面作禮繞百千匝辭退西
行善勝讚言善哉善哉善男子汝今應當正
念思惟三昧正受汝從此去漸漸西行向名
聞城去彼城已有園名難忍城名迦陵提去
此不遠有功德林於其林中有比丘尼名師
子奮迅身紫金色端嚴第一汝詣彼問菩薩

行問菩薩戒問諸法門爾時善財童子逡巡
辭退漸漸遊行至功德林日光泉側見彼比
丘尼端坐正受有五百童女形貌端正以爲
侍者復有五百童子衛護衆女百千天女衛
立左右爾時日光泉側有一園林名曰王園
入彼園中見一大樹名曰月光普放光明照
百由旬莊嚴園林化成重閣七寶嚴飾上有
光明復見大樹名普光明枝葉扶疎徧覆三
千大千世界其形如蓋流出衆水有清淨光
復見寶林名曰華藏高顯無極其華開敷如
天樹王有妙光明如天宮殿其色鮮白猶如
雪山復見大樹名曰美味金華金果柔軟香
美甚適衆心復見一樹名世淨光其色光明
無量無邊梅檀摩尼以爲樹果有阿僧祇諸
雜珠網羅覆樹上像天宮殿復見一樹名曰

天衣常出無量阿僧祇數衆寶色衣復見諸
樹名曰音樂互相振觸聲踰梵音復見衆林
名普香莊嚴其香普熏無有障礙於園林中
復見泉池七寶光網彌覆其上其池四方有
四渠流分爲八支更相灌注八功德水湛然
盈滿牛頭栴檀末爲底泥衆寶莊嚴黃金爲
沙激此香水聲如天樂悅可衆心又以衆寶
而爲欄楯於池岸上布以金沙常放種種雜
色光明優鉢羅華鉢曇摩華拘勿頭華分陀
利華敷榮水上有衆寶樹行列嚴飾圍繞池
側一一樹下各敷無量寶師子座無量天衣
衆妙珍奇以爲嚴飾燒無價香熏師子座衆
香繒帳白淨鮮明寶網覆上垂衆金鈴出和
妙音復有無量衆寶牀帳圍繞高座一一樹
下亦復如是於諸樹間復有無量蓮華寶藏

師子座又於樹間有衆香藏座又於樹間有種種香雲藏座又於樹間有師子寶聚藏座又於樹間有一切世間普光摩尼清淨藏座又於樹間有樂見師子寶藏之座無量妙香以爲敷具此諸寶座一一皆有無量百千諸小牀座以爲圍繞一一小座以無量寶而爲莊嚴一一座上有無量寶珠充滿一切如大寶洲一一座上有勝光明普照王園及日光林於光明中雨天寶衣及雜寶珠柔軟可愛以布其地譬如大海悉具衆寶此日光泉栴檀香水躡則沒蹀隨足旋轉舉足還復本相如故於其池中有衆色鳥鳧鷹鴛鴦翡翠孔雀各自顧影雅音相和飛翔空中集栴檀林此王園林日光泉水出生無盡清淨雜華末無價香散衆華間超過帝釋喜見林池寶樹

寶鈴枝葉華果不鼓自鳴出妙音聲有諸天女端正殊妙如自在天后此王園林倍更明顯勝諸天宮此諸天女鼓樂弦歌聲徧王園充悅一切天劫波毓衣被樹枝間於林四邊有四天王一切皆是大權菩薩領四種兵以爲備衛種種樓閣天繒華蓋及諸殿堂亦有兵衆而衛護之此園莊嚴猶如帝釋照明寶林歡喜之園普皆嚴淨視之無厭出過三界人天果報大梵善淨莊嚴講堂不得爲比無量梵王清淨報眼所不能見此功德林及日光泉假使和合百千梵宮所不能及珍妙莊嚴不可具說爾時善財童子見此園林種種光明微妙嚴飾悉是菩薩本業淨行如實功德善根願力之所成就超絕世間三界果報於不可思議阿僧祇劫諸如來所植衆德本

不著世間遠離揣食猶如幻師見衆色像廣
修淨業無著勝行不可破壞所謂師子奮迅
比丘尼曉了諸法性相如幻本修功德長養
善根成就五力而無所著此王園林廣博嚴
淨普容一切三千大千世界天龍夜叉乾闥
婆阿修羅緊那羅迦樓羅摩睺羅伽人非人
等一切悉集入此王園而不迫迮何以故皆
是師子奮迅比丘尼威神力故不可思議神
通變化皆從菩薩本願海生爾時善財童子
普見一切諸寶樹下師子之座一一座上有
比丘尼名師子奮迅端嚴勝妙威儀庠序其
心善寂調伏諸根如大龍象如如意珠普適
衆願心無所著猶如蓮莖如師子王威伏衆
獸安住不動得無相戒故其心清淨消除煩
惱猶如香王滅除臭穢如大藥王諸藥莊嚴

滅除衆病如良藥王善心見者能除衆病不
善見者反成毒害菩薩摩訶薩亦復如是為
有緣無緣者說微妙法有緣者見我形聞我
聲即得無礙陀羅尼無緣衆生更增惡行無
記衆生即得善心如波樓那天莊嚴微妙普
施世間一切清淨長養善根如良福田又見
此座種種大衆或見淨居天眷屬圍繞又見
摩醯首羅天眷屬圍繞是諸天衆一心諦觀
彼比丘尼目不暫捨時比丘尼即為淨居天
衆及摩醯首羅天等說無盡法門無受法行
又見此座欲樂天子眷屬圍繞一心瞻仰觀
比丘尼目不暫捨時比丘尼為欲天衆說普
明音聲名聞清淨法門又見此座自在天王
天子天女眷屬圍繞一心諦觀彼比丘尼目
不暫捨時比丘尼為自在天衆說菩薩名字

自在清淨法門又見此座化樂天王天子天女眷屬圍繞一心諦觀彼比丘尼目不暫捨時比丘尼爲化樂天衆說一切法清淨莊嚴法門又見此座兜率天王天子天女眷屬圍繞一心諦觀彼比丘尼目不暫捨時比丘尼爲兜率天衆說安樂心藏旋復自在無礙陀羅尼法門又見此座夜摩天王眷屬圍繞一心諦觀彼比丘尼目不暫捨時比丘尼爲夜摩天衆說出生無量清淨勝妙莊嚴法門又見此座釋提桓因眷屬圍繞一心諦觀彼比丘尼目不暫捨時比丘尼爲釋天衆說不淨忍猷離無常苦空無我法門又見此座解空娑伽羅龍王與十光明龍王等眷屬圍繞難陀龍王跋難陀龍王等眷屬圍繞摩那斯龍王伊那槃那龍王阿菟婆達多龍王等各與

龍子龍女眷屬圍繞一心諦觀彼比丘尼目不暫捨時比丘尼爲諸龍王說一切救護善巧方便法門又見此座提頭賴吒天王領乾闥婆等男女大小眷屬圍繞一心諦觀彼比丘尼目不暫捨時比丘尼爲說歡喜無盡法門又見此座摩睺羅伽阿脩羅王眷屬圍繞一心諦觀彼比丘尼目不暫捨時比丘尼爲說法界莊嚴明慧速疾法門又見此座大天勢力迦樓羅王男女大小眷屬圍繞一心諦觀彼比丘尼目不暫捨時比丘尼爲說度生死海無所畏法門又見此座善音緊那羅王男女大小眷屬圍繞一心諦觀彼比丘尼目不暫捨時比丘尼爲說佛本行清淨無著法門又見此座金角雲結摩睺羅伽王男女大小眷屬圍繞一心諦觀彼比丘尼目不暫捨

時比丘尼為說諸佛歡喜普集法門又見此座無量男女童男童女眷屬圍繞一心諦觀彼比丘尼目不暫捨時比丘尼為說無勝法門又見此座常食衆生精氣羅刹王等眷屬圍繞一心諦觀彼比丘尼目不暫捨時比丘尼為說普慈悲觀法門又見此座出家聲聞一切皆集俱來會坐時比丘尼為說智慧光明勝法門又見此座出家樂緣覺者俱來會坐時比丘尼為說淨明佛功德法門又見出家樂大乘者眷屬圍繞俱來會坐時比丘尼為說普門智慧光明三昧法門又見此座初發心菩薩眷屬圍繞一心諦觀彼比丘尼目不暫捨時比丘尼為說一切諸佛大願聚法門又見此座二地菩薩眷屬圍繞一心諦觀彼比丘尼目不暫捨時比丘尼為說虛空明

淨羅摩伽三昧法門又見此座三地菩薩眷屬圍繞一心諦觀彼比丘尼目不暫捨時比丘尼為說莊嚴寂靜法門又見此座四地菩薩眷屬圍繞一心諦觀彼比丘尼目不暫捨時比丘尼為說一切種智勢力境界法門又見此座五地菩薩眷屬圍繞一心諦觀彼比丘尼目不暫捨時比丘尼為說普集淨華藏法門又見此座六地菩薩眷屬圍繞一心諦觀彼比丘尼目不暫捨時比丘尼為說出世清淨藏法門又見此座七地菩薩眷屬圍繞一心諦觀彼比丘尼目不暫捨時比丘尼為說普依止清淨地藏法門又見此座八地菩薩眷屬圍繞一心諦觀彼比丘尼目不暫捨時比丘尼為說法界毗羅摩伽普徧法身化現一切虛空境界法門又見此座九地菩薩

眷屬圍繞一心諦觀彼比丘尼目不暫捨時
比丘尼爲說無礙無著清淨力莊嚴法門又
見此座十地菩薩眷屬圍繞一心諦觀彼比
丘尼目不暫捨時比丘尼爲說圓滿無障礙
淨名三昧法門又見此座金剛力士眷屬圍
繞一心諦觀彼比丘尼目不暫捨時比丘尼
爲說智慧莊嚴那羅延金剛相三昧法門如
是等一切大衆一切衆生一切諸趣所應受
化者一切眷屬種種善根者隨諸衆生種種欲
種種行種種道樂聞多法者爲長養善根故
爲增長善根故莊嚴善根故隨其所應開示
顯說阿耨多羅三藐三菩提轉不退轉法輪
令諸衆生得不退轉何以故此皆是師子奮
迅比丘尼成就普眼智慧光明捨離法門成
就一切諸佛法界無相清淨法界通達無礙

法門此比丘尼成就無著無礙清淨祕藏法
門成就圓滿不可思議淨藏法門成就清淨
普喜見藏法門成就十萬億不可數般若波
羅蜜成就普眼般若波羅蜜成就一切佛法
法界不可壞般若波羅蜜此王園林日光泉
側一切大衆菩薩摩訶薩等一切皆悉久植
善根緣此比丘尼說法教化乃至阿耨多羅
三藐三菩提其心善寂得不退轉爾時善財
童子見師子奮迅比丘尼久已成就如是等
普門法門普現色身而自莊嚴令王園林日
光泉水及諸寶樹衆師子座皆現希有奇特
之事所有園林經行禪窟及諸所須寶物牀
帳見諸大衆一切眷屬悉坐其中功德神力
皆悉具足八種音聲說衆妙法爾時善財童
子見此不可思議諸奇特事及聞微妙八種

音聲復聞不可思議清淨妙音宣揚讚歎無量法雲法門以此法門潤澤身心皆令柔輒此名正法對治無比法門得此法門已身心歡喜豁然大悟成就一切諸大法門恭敬合掌繞百千匝即前作禮未舉頭頃見比丘尼徧處一切師子寶座放光明金色赫奕照王園林及諸樹木猶如光雲此光明力令諸樹木皆悉右旋繞無數匝此諸樹木行行相次皆放光明照比丘尼爾時善財童子觀此相已合掌而立恭敬却行住於一面向白言大聖我已先發阿耨多羅三藐三菩提心惟願大聖慈悲憐愍爲我宣說我今不知云何學菩薩行修菩薩道惟願大聖爲我解說時比丘尼答善財言善哉善哉善男子我今知此一切種智普能開現無底法門善財童子白

言大聖一切種智無底法門體性云何時比丘尼答善財言善男子此是三世大聖智慧光明莊嚴法門善財童子白言大聖三世諸佛智慧光明莊嚴法門境界云何答言善男子入此法門者得深入現前分別正受一切諸法不生不滅平等法林莊嚴三昧住此三昧者即得如意自在神通此閻浮提示現處兜率天十方無量微塵世界處兜率天亦復如是於彼彼處一一佛所示現無量無數之身從於自身出無量無數微塵等佛刹海摩菟摩身恭敬禮拜修諸福業又賚無量無數不可說不可說微塵數雜色華雲不可說不可說雜色瓔珞雲不可說不可說雜色寶鬘雲不可說不可說雜色塗香末香雲不可說不可說雜色繒蓋幢幡雲不可說不可說雜

色寶網寶帳雲不可說不可說雜色寶座雲
一一座前有不可說不可說燈光焰莊嚴雲
一一燈光有衆寶珠而莊嚴之乃至不可說
不可說一切雜色莊嚴具雲供養如來又膏
不可說不可說雜色香水雲從香水雲中出
不可說不可說雜寶蓮華雲從雜寶蓮華雲
出不可說不可說天瓔珞莊嚴雲諸寶光明
莊嚴具乃至阿迦膩吒一切諸天供養具雲
又從香水出不可說不可說轉輪聖王及諸
小王一切世間諸供養具雲又從香水出不
可說不可說龍神八部乃至一切不可說不
可說供養具雲供養如來遍一切處一切諸
菩薩處兜率天化乘白象降神母胎初生王
宮捨家學道詣菩提樹成等正覺轉淨法輪
昇忉利天爲母說法天上人中變現自在乃

至涅槃於諸佛所植衆德本以此本願因緣
力故示現摩菟摩色身徧一切處供養諸佛
諸供養具亦復如是如是種種諸供養具亦
緣久修大願莊嚴法界力生若有衆生知我
所修如是供養者皆於阿耨多羅三藐三菩
提得不退轉若有衆生來至我所我即爲說
摩訶般若波羅蜜示教利喜善男子汝今當
知我常不起衆生相不著衆生相衆生無相
故知一切語言音聲而不著音聲音聲無性
相故見一切佛光明相好而不著相好何以
故深知法身無色相故受持一切諸佛法輪
而亦不著法輪之相深心解了諸法真如實
際法性相故於念念中充滿徧徧虛空法界
而亦不著法界相善能了知一切諸法如幻
化相故善男子我惟知此一切種智普能開

現無底菩薩法門善男子汝今當知諸大菩薩究竟法界一切菩薩境界無著能以一身結跏趺坐充滿十方一切世界於自身內悉能示現一切十方諸佛刹土妙莊嚴事於刹那刹那頃周遍十方禮事諸佛於自身內普能示現一切諸佛神通變化願力能以一毛徧縛十方諸須彌山舉置他方無量世界於一一毛孔普現十方一切世界劫成壞相於一刹那頃普於十方不可說不可說劫攝受眾生終不捨離諸大菩薩摩訶薩具足一切深智海行我當云何能知能說彼功德願善男子汝從此南行有國名險難城名寶莊嚴於彼城中有一女人名婆須蜜多汝詣彼問云何菩薩學菩薩行修菩薩道

佛說羅摩伽經卷第一

音釋

阿	躄	躄	吒	躄	躄	躄	躄	躄	躄	躄	躄	躄	躄	躄	躄	躄	躄	躄	躄	躄
竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也	竟天也